

E Doló di Orea Kòrtá!

Nos dushi idioma ta riku na ekspreshonnan figurativo. Ku frekuensia nos ta usa nan den nos kombersashonnan. Nos tur ta komprendé ku e ekspreshonnan figurativo ta referí na sierto realidat i no por ser tumá den un sintido literal. Por ehèmpel si bo ta bisa, “E señora tin lenga largu,” ningun hende lo pidi e señora pa habri boka pa determiná presis kuantu sèntimeter su lenga ta midi. “Kabes di boto,” “wowo skèrpi,” “kohe awa,” “laga na kaya,” “ranka orea,” èts., tur ta ekspreshonnan figurativo pa un siertu realidat.

Kisas ningun di nos ekspreshonnan ta zona mas sadista ku “kòrta orea.” Nos no sa origen di e ekspreshon aki (Pakiko ta kòrta nèt **orea?**), ma nos por sinti doló. Kisas abo ta visualisá un orea ku un raská chikitu, nada mas. Ma un otro persona ta imaginá un hende ku ta trose di doló ta pone man na banda di kara i ta bah’é bek tur na sanger; e orea di baina pegá na kabes, kologando na un manera straño, òf un pida orea bentá abou na suela.

Nos tur sa ku e ekspreshon figurativo “kòrta orea” ta referí na adulterio. Nos kurpa a kohe rel ora nos a deskribí kortamentu di orea físiko. Ma adulterio ta okashoná **muchu mas doló** sikológiko i sosial. Tòg nos kurpa no ta kohe rel pa ku e piká aki ku ta sosodé ku frekuensia den nos komunidad!

Siman pasá nos a ser informá ku un sondeo religioso/sosial na final di aña 1993 a haña ku ocho di kada dies hòmber na Kòrsou ta kòrta orea di nan kasá! E sifra aki ta alarmante! Si esaki ta e kaso na Kòrsou, sigur sífranan pa nos isla no ta masha diferente.

Hopi hende hòmber ta haña ta masha normal pa hòrta shòrt di bes en kuantu òf pa nan tin un òf mas baisait. (“No por kome pòrchòp tur dia,” nan ta argumentá.) Ma nan ta bira razu sí e esposa tambe ke tin su “aventuranan.”

Nos ta kondená e mentalidat machista. Ma nos ta kondená e echu ku kòrtamentu di orea di parti di muhénan kasá tambe ta oumentando. Dios no ta hasi distinsjon. Adulterio di ambos sekso ta piká! “No kometé adulterio” (Exodo 20:14) ketu bai ta un di e Dies Mandamentunan.

Dios a krea matrimonio komo un union **eksklusivo**. “...un hòmber lo laga su tata i su mama i lo uni ku su muhé, i e dosnan ei lo bira un karni” (Mateo 19:5). Kòrtamentu di orea ta hasi daño serio (tin bes ireparabel) na e eksklusividat.

Tantu “eksperto” awendia ta pretendé ku nan sa mihó ku Esun ku a krea e famia. Segun nan, “Mester tin un konsepto nobo di e famia pa nos era nobo!” Nan ta usa sífranan manera esaki pa hustifiká nan ideanan apsurdo. Ma Dios nunca a kambia Su plan original pa e famia.

Segun nan konsepto, komportashon di hopi mester determiná loke ta aseptabel i loke ta aseptabel ta loke ta korekto. Ma Dios no ta aprobá di siertu akto pasobra e ta sosodé ku frekuensia! Dios no ta funshoná a base di prinsipionan demokrátiko, esta ku mayoria tin rason. Dios—**Dios so**—tin rason! Hende meste ahustá nan komportashon na Su reglanan divino!

Si ta bèrdat ku 80% di hòmbernan kasá no konosé fidelidat matrimonial, esei tin implikashonnan sumamente serio pa ku nos komunidad. Kòrtamentu di orea ta demonstrá bon kla ki sorto di hende bo ta. Nos por bisa kategórikamente ku un hende ku ta kometé adulterio ta un gañadó! Maske el a primintí di keda fiel na su kasá “den bon i den malu, den rikesa i pobresa, den salú i enfermedat...te morto separá nos fo’i otro,” e no a kumpli. Un hende ku no por ser konfiá pa kumpli ku su palabra pa ku e relashon mas íntimo konosí pa hende ta un persona ku no por ser konfiá! Un hende ku ta traishoná esun ku e ta mas será ku n’è ta un hende ku ta kapas pa traishoná ken ku ta. I tristu ta ku nos komunidad, segun e sondeo, ta kan kan yen di hende inkonfiabel, gañadó, traishonadó...

E doló okashoná pa adulterio ta multipliká. Un akto kontra moralidat lo destruí konfiansa di bo kasá. Bo yunan por karga e konsekuensianan di bo imprudensia pa e restu di nan bida. I dia ta bin ku bo mes lo kosechá e fruta marga ku bo a planta. Kon ku bo bir’é, kòrtamentu di orea no ta bal e la pena!